

Promé Minister Mr. Henny Eman

Betico Croes nificá union di pueblo, banduné e contenido cu e merecé

ORANJESTAD - Tabata un poco dia pasá cu henter mundo a celebrá e cambio di milenio, cambio di siglo y a drenta aña 2000. Tabata momento histórico di celebracion cu no ta tur hende por a celebrá den e mundo aki.

Y awe ora nos ta pará pa celebrá un dia manera Dia di Betico, e ta pone nos pensa, muy en particular na comienzo di e aña nobo aki, cu nos mester duna e conmemoracion di Betico Croes, un contenido hopi mas aya. Na palabra tabata

Promé Minister Mr. Henny Eman, ayera mainta riba Plaza Betico Croes.

N'e acto protocolario di ayera mainta, por a mira presencia di Gobernador Mr. Olindo Koolman y señora, Presidente di Parlamento, Mr. Eddy Croes y señora y algun Minister, pero masha poco Parlamentario y otro invitadonan.

Promé Minister Mr. Henny Eman den su discurso a bisa cu celebracion di Dia di Betico no mester bira un rutina di un dia liber, pero mester duné mas contenido, unda nos mester percurá pa haci uso di e

momentonan di celebracion y conmemoracion pa mira bek kico tabata e bida di Betico Croes, kico tabata su intencion, kico tabata e mensahe cu nos mester sigui carga y hiba den nos comunidad.

Promé Minister Eman a bisa cu un di e puntonan cu nos mester concentrá hopi riba dje durante e último lunanan, t'e sentimento cu nos ta deseá pa nos país. E sentimento di union.

Nos a mira un gran luchador percurá pa miles y miles di hende ta uní tras di un causa grandi pa un pueblo y un país, esta pa tin e libertad pa por



Promé Minister Mr. Henny Eman

dicidí riba propio rumbo. E libertad pa dicidí e direccion cu nos kier bai. Un lucha cu a worde hiba, cu a uni un pueblo, a pone un pueblo para fuerte pa sigurá e futuro aki.

Ora cu nos mira rond mundo y compará nos mes cu locual otro paísnan tin, nos mester bisa cu nos por ta orguyoso, satisfecho y fuerte, pasobra nos ta bibando den un país, den un comunidad, unda tin un progreso grandi, cu ta worde compartí y repartí na un manera husto den nos comunidad.

N'e momento aki, miembronan di Comision di Accion Aruba Dushi Tera a presentá riba Plaza Betico Croes, cantando Himno pa despues depositá un ofrenda floral y a duna Promé Minister Eman y tambe na Glenbert Croes un manifesto, pa despues di esaki bolbe Sociedad Bolivariana.

Promé Minister Eman despues a sigui cu su discurso, bisando cu e grupo aki tambe a bin duna homenahe nos nos jiu di terra, Betico Croes, manera debe ser y por ta hopi mas por haci den futuro.

Eman a pidi pa laga e Dia di Betico ta un dia unda nos tur ta consciente, cu e mester tin un dia cu mas contenido. E ora ey, e pensamiento ta bai pa tin union

den nos pueblo. E sentimento común di un direccion y esey hustamente por sinti na Aruba, cu política partidista, specialmente den e organizacion político cu el a laga atras, ta biba basá riba polarizacion y polemica.

Ta pesey nos a haci un yamada den pasado, y cu Promé Minister Mr. Henny Eman a haci riba e dia aki atrobe, den conmemoracion di dia di nacemento di Betico Croes, pa laga nos haci uso di e estimulacion, di e inspiracion cu Betico a duna nos, pa nos uni nos pueblo pa yega na un desarrojo, cu no solamente berdaderamente nos tin progreso material, pero pa nos tin progreso spiritual tambe pa nos tur sinti cu Aruba aki ta di nos tur. Y no un Aruba cu ta partí den polemica y polarizacion.

Pesey Eman a haci un yamada riba e contricantenan político pa reflexioná, pensa bon den ki direccion nos país mester bai. Y sigur riba un dia manera esaki, Dia di Betico, cu nos tur ta conmemorá un jiu di terra grandi, pa laga esaki t'e estimulo pa nos ta hunto uní pa un mihor Aruba, tabata e mensahe di Promé Minister Mr. Henny Eman, conmemorando Dia di Betico.